



**E**CKardus Austriaeus ordinis (ut quidam uolunt) prædicatorum, in diuinis scripturis eruditus, & in philosophia Aristotelica omnium suo tempore doctissimus fuit. Erat is foelicissimo ingenio & mira eloquentia præditus. Cum autem Eckardus uarias superstitiones paulatim in Ecclesiam adductas intelligeret, atque pontificum factum animaduerneret, nouitatem terminorum contra aliorum Theologorum consuetudinem suis commentarijs immiscuit, atque Ecclesiæ errores ostendit. Hinc factum ut septemdecim eius articuli à pontifice fuerint damnati, quos etiam ille sub uitæ finem multorum precibus persuasus reuocauit.

Hos tamen postea Heidelbergensis schola, Anno reparatæ salutis humanæ millesimo quadringentesimo tricesimo, ex eius commentarijs super Iohannem erutos denuò condemnauit, atque seorsim eius opusculis adiecit. Scripserat is eruditè in Genesim, Exodum, librum Sapientiæ, Cantica, in Euangelium Iohannis, & super libros sententiarum. Cum hoc modo in Austria docendo & prædicando in magno pretio esset, tandem mortuus est sub Heinrico septimo Imperatore, anno salutis millesimo trecentesimo decimo. Trith.